

Kurt Burgelman

## Nuunt ezuu verlief

Es maa dat hier een misère, ja ik zie hier maane pére  
De taad goa nie veuruit moar aa blaaf stoan

Ja ik ben maa aan't verlien en da wirkt op maanen tien  
En ik zoe zuu girre buite wille goan

Moar da meug nie en terecht want doarbuite, doar es't slecht  
Oast er nen ander op û oasemt, worde ziek

Dus blaave 'k schuune binne, 'k è nû taad om te bezinne  
'k è nû taad veur maan gezin en romantiek

Moar maane zeune zit te chatte en maan dochters zijn aan't  
blètte  
Want ik è doarjuust tv kapot geprutst

**Ik verlieje maa stienduud**  
**Maan rekeningen stoan in 't ruud**  
**Dus online shoppe goa nie mier**  
**Dus luupe 'k hier de muren op**  
**'t Es taad dat die misère stopt**  
**Want 'k zit al doage zonder bier...**

**'k è maa nog nuunt ezuu verlief**

Maan madam die é een laaste, z'é het g'hange an de vaaster  
Mee de denge die "k zual zoe keune doen

En ze blaave 't moar herhoale, gienen taad veur af te dwoale  
Dus da laastse 'n èk alliest niemier vandoen

'k zoe ne kapstok moeten hangen en tons zoe ze nog verlange dat  
de garage opgekuist geroakt

'k moe maan kaases nog sortere en miljaarde z' es doar were  
Van da commandere, é z' heur wirk gemoakt

'k zoe wille zegge "ik ben ziek" moar tons moe'k noar de kliniek  
En doar wille 'k dezer doage nie noartoe

Dus ik moake korte mette, ik kruip achter maan gazette  
Z' es al uit moar ik ben liever lui dan moe

**Ik verlieje maa stienduud...**

'k è maan tieren al geteld... 'k è maan leven al verteld... w' èm al ure  
gemanild... maane  
Facebook, die sloa tilt... 'k è al alles geprobeerd, moar...

**Ik verlieje maa stienduud...**